

## **Ebe ni iPo<sup>lu</sup> ọ keke ghi egbo** **Efisha** **Eni e miesuo**

*IPolu ọ tse eni e mie iJesu suo ne la Efesosi*

<sup>1</sup> Mhemhe iPo<sup>lu</sup>, aghiusomhi na kee oyi iJesu iKirisiti ni Eshinegba ọ ze mhi khi.\*

Egbo eyi Eshinegba ni e la eke Efesosi, eni e reg-benga iJesu iKirisiti mhi keke ebe ona a ghi. <sup>2</sup> Mhi lema Eshinegba ita awa ali iJesu iKirisiti Onomhue, e ka mhuẹ isomhelemhi na e, e gbo ri opfomhe na e.

*Eshinegba ọ she te obọ oyi iKirisiti riẹle eminete na awa*

<sup>3</sup> Awa kuẹghie Eshinegba. Lọli ọ khi Eshinegba ali ita iJesu iKirisiti Onomhue oyi awa. Lọli ọ ri ikhivose ni o te iloghie bhale na awa, ikhivose oni ọ kpaghie ayemhe oyi awa obọ. Ikugbe ni ọ ku awa ali iKirisiti gbe ọ ro riẹle ona. <sup>4</sup> Neni Eshinegba ọ ma agbo, ọ she kpe ze awa eni e khi egbo eyoli, rote obọ oyi iJesu iKirisiti, ini awa khi eni e pfuase ni ea mhuẹ umha-guẹkia shi odalo oyi Eshinegba. Itobo khi ọọ nono ingme oyawa ọ ro ligho riẹle oli. <sup>5</sup> Neni Eshinegba ọ ma agbo, ọ she te eke gba li khi loli ya ri awa mele imi oli-a, itobo emini iJesu iKirisiti ọ riẹle, ni o de shi ọ abi o ghole Eshinegba. <sup>6</sup> Eri ọ lina riẹle oli ini awa kuẹghie oli shi okhale oniẹmhi ni ọ

---

\* **1:1** Li ze Ika 18.19-21; 19.1

mhuẹ na awa, itobọ emini omi ọli ọtuoghwo kpe ni ọ nono ingme oyọli, ọ riẹle.

<sup>7</sup> Obọ oyi iKirisiti awa te mhọli ipfasheke, itobọ ọlia eyọli ni ọ ku shi eke abi ọ rọ ghu-a na awa. Ona a te ri olamhe topfa awa. Itobọ ẹpfue oyi okhale oyi Eshinegba ni o gbeku ọ, ọ rọ riẹle ona.† <sup>8</sup> Oni okhale ona ọ tutu ku awa, rọte ilẹsingme ali ẹgbhe ọ te riẹle ọli. <sup>9</sup> Eshinegba Ọ khueghie osheli emini ọ gba shi eke-a khasẹ awa, ikhi emini ọ rọte obọ oyi iJesu iKirisiti rọ tse, abi o ghọle ọli. <sup>10</sup> Emini Eshinegba ọ gba khi lọli ya pfuse riẹle khi, ini o ramhi oni ẹghẹghẹ te, ọ ya ku emhi na agbọ ali ena iloghie gbe khi oghuo, ọ ya ri iKirisiti le oghie wẹwẹ nya. <sup>11</sup> Itobọ khi Eshinegba ọ ku anye ali iKirisiti gbe, anye she mie ugu obọ oyi Eshinegba. Irari khi ọ she kpe te eke gba li khi lọli ligho ya riẹle ọli, ọ rọ ligho riẹle ọli. Ọ ri emhikpa tse shi abi o ghọle ọli shi. <sup>12</sup> Ishegho ni anye iJu ni e khi ẹgbọ eni odode ni e kpe regbenga iKirisiti, e kuẹghie Eshinegba shi ufumhi oyọli. <sup>13</sup> Eri a li ku ẹ ma iKirisiti abi a rọ suọ oni ungmehi igesikia, oni o khi usomhi onete oyi Eshinegba, abi ọ mie ẹ pfuese. Abi a rọ mie iKirisiti suọ, Eshinegba ọ rọ shi ọlele shi ẹ egbe. Ayemhe-nọ-pfuase ni Ọ kie kpe rọ nga na awa o khi oni ọlele. <sup>14</sup> Itobọ Ayemhe-nọ-pfuase ni Eshinegba ọ kpe rọ na awa, awa rọ mhọli ọ shi udu khi Eshinegba ọ ya ri emini ọ rọ nga na ẹgbọ eyọli gbo na awa. Ẹghẹghẹ ni Eshinegba ọ rọ pfa awa ẹgbọ eyọli shi eke nya, awa rọ mhọli eni emhi ena. Ona o ya ri ẹgbọ eyọli kuẹghie oli shi ufumhi oyọli.

*IPọlu ọ lema na eni e mie iJesu suọ ni e la Efesosi*

---

† 1:7 Li zẹ iKolo 1.14

15 Itobo emhi ena nya ni Eshinegba o rięę, ali abi mhi te suọ abi a mie iJesu iKirisiti Onomhue suọ ni a gbo mholi inono shi egbọ eyi Eshinegba nya o, 16 mhia tigbe yemhe ikphemhi-a, ni mhi ri itobo oye e kphemhi na Eshinegba, ini mhi da lema na e. 17 Eri mhia lema Eshinegba oyi iJesu iKirisiti Onomhue oyawa, oni o khi ita awa ni o mholi ufumhi oniemi, o re e mholi ayemhe ileasingme. O gbo ri egbe oli khasę e ni a lolo lese oli egbegbo. 18 Mhi gbo lema Eshinegba o khueghie e udu-a ini a lese oni igesikia oyoli, ini a gbo lese irudushi ni a regbenga, ni Eshinegba o lu e shi. Ni a gbo me epfue oyi ugu oniemi oyoli ni eni e mie oli suọ e mholi. 19 Mhi gbo lema li o ze ni a lese ekpabo ni e fune eyoli, ni ea mhue irokhokho, ni a ro na awa eni e miesuọ. 20 Eni ekpabo ena o ro gbe akanya abi o ro guise iKirisiti eghuli le abi o ro ghua. Wewe o ro ri iKirisiti shito obo ita oyoli obini iloghie.† 21 Oobo iJesu iKirisiti o la mhesę na ekpabo, ali itoto ali igeni, ghe enete ghe eni ea ti, ghe eni a me agbo ona ne, ghe ena agbo ni aa me ne. 22 Emhi nya Eshinegba o ro shi ufuege oyoli ni o mhesę shi. Loli o ze iJesu ozukhomhi emhi nya ni o pfomhe igbaa oyi eni e mie iJesu iKirisiti suọ eyoli egbe. 23 Egbọ ni e mie iJesu suọ e khi idiegbe oyi iJesu, iJesu o khi ukhomhi. Ekpabo ali agbo oyi iJesu iKirisiti o vose agbo eyi eni e mie oli suọ. Ufumhi oyoli o gasę agbo ali emhikpa odekhode nya.‡

## 2

---

† 1:20 Li ze Iwolo 110.1 § 1:23 Li ze Iwolo 8.6; iKolo 1.18

*Okhale oyi Eshinegba o ro mie awa pfuese*

<sup>1</sup> Eghẹghẹ ni o dọsẹ ni a ro kpẹ la agbọ olamhẹ, a la agbọ umha-suọesọ, a khi ẹgbọ eni e ghu shi olamhẹ ni ẹa mhọli Ayẹmhẹ oyi Eshinegba. <sup>2</sup> Eghẹghẹ aghọ ingeli agbọ a ngeli, a ri ungmehi oyi ọkphaghiẹ ọni ọ khi oghie ayẹmhẹ alo ebili i gbe akanya. Oni ayẹmhẹ ona o kiele la agbọ oyi ẹgbọ ni ẹa ya suọ esọ na Eshinegba a gbe akanya. <sup>3</sup> Ighọ awa nya awa kpẹ li ngeli. Awa ri ọghuẹmhẹ egbe, ali usamhi ebe ni udu oyi awa o gueyẹ awa a riẹlẹ emhikpa. Abi ẹgbọesẹ na agbọ ni ẹa ya suọ esọ na Eshinegba e li ya pfua, awa kha li pfua. <sup>4</sup> Ama Eshinegba ọ nono ingme oyi awa gba, ighọ ilẹlemhi oyọli óó gbẹdi. <sup>5</sup> Lọli o zẹ ni ọ ro rọte obọ oyi iJesu iKirisiti ni ọ guise le ri agbọ ayẹmhẹ onogbọ na awa, aboriẹkhia khi eni umha-guekia o keşẹ-a awa khi. Okhale oyi Eshinegba a ro mie ẹ pfuese.\* <sup>6</sup> Eri ọ ri agbọ onogbọ oyi iKirisiti na awa, ọ ri awa nu iKirisiti shitọ obini iloghie, nu ọ li ẹ mhẹşẹ, itobọ emini iKirisiti ọ riẹlẹ na awa. <sup>7</sup> Rọte iJesu iKirisiti Eshinegba ọ te ri okhale ni ọ mhọli na awa khase, ogbenakọ ni ẹgbọ e mẹ ashini okhale oyọli o fu ramhi, ni ọa mhọli irọkhọkhọ. <sup>8</sup> Okhale oyi Eshinegba a ro mie ẹ pfuese abi u ro miesuọ, ọa khi ingeli enete ni u ngeli e mie ẹ pfuese. Afuẹ-afuẹ ọ mie ẹ pfuese. <sup>9</sup> Eshinegba ọa ri itobọ ingeli enete ni u ngeli mie ẹ pfuese, ini ọgbọkhọghuo ọ khi vuse ike. <sup>10</sup> Eshinegba ọ ma awa. Ikanya enete ọ ma awa awa ke gbe abi awa ali iJesu iKirisiti awa ro da ke khi ọghuo eghọ.

*Eshinegba o she te iKirisiti ku ẹgbọ ifu ali ẹgbọ ifeta*

---

\* 2:5 Li zẹ iKolo 2.13

*gbe*

<sup>11</sup> A yelele ẹgbọ enabi a khi ẹlẹlẹ, khi aa khi iJu. Ẹgbọ iJu e ma kpẹ ri ukpẹloe gbe ẹ, itobọ khi aa sheḷe a, ali itobọ khi aa khi ẹgbọ iJu. Ama ee lu egbe wẹ eni e khi egbegbi ẹgbọ, itobọ khi a sheḷe wẹ-a. Osheḷe ni o khi akanya ni ẹgbọ e ri abọ gbe idiegbe. <sup>12</sup> Yelele khi ẹghẹghẹ aghọ khi aa kpẹ ku ma iJesu iKirisiti ọ, a khi ọpẹse shi ishiobọ ni Ẹshinẹgba ọ rọ nga na ẹgbọ iZireni. A khi eni ẹa mhọli iregbenga ni ẹa mhọli Ẹshinẹgba shi elemhi agbọ. <sup>13</sup> Ama, memena, ẹẹ ni a kpẹ nuata shi Ẹshinẹgba ọ, ọ ri ọlia eyi iKirisiti ti ẹ mama egbe.

<sup>14</sup> IJesu iKirisiti ọ ri ẹgbọ iJeta ali ẹgbọ iJu rieḷe. Ọ rue ugbe ibiselemhi ni o kpẹ la wẹ iteva ode-a, ọ rẹwẹ mele ẹgbọ eghuo-a. <sup>15</sup> Eghuli ni ọ ghu ọ rọ shishi ishi ni e la wẹ iteva-a, Ini ọ mẹ asha ri ẹgbọ iJu ali ẹgbọ iJeta khi ẹgbọ enegbọ eghuo. Ona ọ rọ rẹwẹ rieḷe ini e khi ke biselemhi egbe.† <sup>16</sup> Eghuli ni ọ ghu-a shi ọọra apfida ọ rọ ku ẹgbọ ena gbe, ọ gbo rẹwẹ ali Ẹshinẹgba rieḷe. Aghọ ibiselemhi egbewẹ o pfo shi.‡ <sup>17</sup> Usomhi onete oyi Ẹshinẹgba oyi opfomhẹ, iJesu ọ bhale ya tṣẹ abọ gueyẹ ẹgbọ iJeta ni e nuata shi Ẹshinẹgba ọ, ali ẹgbọ iJu ni e timama Ẹshinẹgba.§ <sup>18</sup> Obọ oyi iJesu iKirisiti awa te mhọli Ayemhẹ oghuo ni o zẹ khi awa ga rọ dobe a lẹ deba Ẹshinẹgba.

<sup>19</sup> Itobọ ighọ ẹẹ ẹgbọ iJeta, aa ke khi epfese, ama a she ku ma ẹgbọ eyi Ẹshinẹgba. Ena omhufe-apfe oghuo a ke ga khi. <sup>20</sup> Oni idiegbe owa a li khi. Ighiusomhi na kẹ ni iKirisiti ọ ze ali emekeguele

---

† 2:15 Li zẹ iKolo 2.14 ‡ 2:16 Li zẹ iKolo 1.20 § 2:17 Li zẹ Aza 57.19

eyi Eshinegba e khi igbaekele oyi oni owa. Ijesu iKirisiti o mu oni owa mhue. <sup>21</sup> IKirisiti o ze ni eche ni a ro ma oni owa nya e ro toma, ni oni owa o ro mele owa oniemi a. O ro li khi oni o pfuase na Onomhue. <sup>22</sup> Itobo khi a ku ma ijesu o, o ro re e ma eni e mie oli suo. U ya mele owa ni Ayemhe oyi Eshinegba o ya ke la-a.

### 3

#### *Eshinegba o ghi iPolu ghi egbo iJeta*

<sup>1</sup> Itobo ona, mheme iPolu mhi ro lema na e. Mheme ni a ri itobo khi mhia gbe akanya na ijesu iKirisiti mu shi owa ighumha. Akanya abi mhi lie tse abo usomhi onete oyi Eshinegba ye e egbo iJeta. <sup>2</sup> O limhe eloe khi ee egbo iJeta, khi a she kpe suo khi Eshinegba o ghie mhe ghi e mhi bhale ya tse abo ye e. Itobo okhale oyoli o ro ghie mhe usomhi ona, ni mhi kpaghie e obo. <sup>3</sup> Oni usomhi khi, ugbamhi ni Eshinegba o gba ni o khi oyi osheli, ni o khueghie-a khashe mhe. Mhi kpe khueghie ukuku o li-a khashe e elemhi ebe ni mhi kpe keke ghi e. <sup>4</sup> Ini a ze ebe onana, a ya me emini mhi lese osheli oniemi ni o khi osheli na ijesu iKirisiti, ni Eshinegba o gba. <sup>5</sup> Eshinegba o a kpe khueghie osheli emini o ya riele ni o gba shi eke khashe egbo na agbo ena elele. Ama o she rote elemhi Ayemhe-no-pfuase khueghie oli-a khashe ighiusomhi na kee ali emekeguele eyi Eshinegba. <sup>6</sup> Emini Eshinegba o gba khi, a ya rote itsabo usomhi onete oyi ijesu iKirisiti ri egbo iJeta ni e miesuo nu egbo iZireni ni e miesuo le ugu oghuo, abi egbo ni e khi idiegbe oghuo. Eghenge agho ni a bhale ya e khi ee ni aa

khi ẹgbọ iJu, a nu ẹgbọ iJu mhue obọ shi emini Eshinegba ọ rọte iJesu iKirisiti rọ nga na iJu.\*

<sup>7</sup> Eshinegba ọ ri akanya ni mhi rọ ọ tse abọ usomhi onete oyọli na mhe. Itobọ okhale oyọli ọ rọ ri oni akanya na mhe. Ọ ri ekpabọ eyọli rẹ mhe ẹ gbe oni akanya. <sup>8</sup> Ini Eshinegba ọ pfi ukpelo bino uwali ọgbọ ni mhi kpẹ khi ẹlẹlẹ lọ, ọa kha zẹ mhẹ, mhi ke tse abọ usomhi onete oyọli. Ama itobọ okhale oyọli ọ rọ ri akanya ona na mhe mhi ka tse abọ usomhi onete oyi upfuemhi ni o la iKirisiti yẹ ẹ ẹgbọ iJeta. Upfuemhi ni ọgbọ ọa dobe leşe udi ọli ẹ pfo. <sup>9</sup> Ọ gbo zẹ mhẹ mhi ka khueghie-a khase agbọ kpa abi ọ li ri oni osheli ni ọ gba nya ya tse. Eshinegba ni ọ ma emhi nya ọ kpẹ rọ te igbaekele ri osheli ona sheli agbọ nya. <sup>10</sup> Eri Eshinegba ọọ nono ni lọli rọte igbaa oyi eni e mie iJesu iKirisiti suọ ri ileşingme ode ebubu eyelue khase igeni ali ekpabọ na idane. <sup>11</sup> Ina Eshinegba ọ te eke gba li neni ọ ma agbọ. Rọ te iJesu iKirisiti Onomhue oyi awa ọ te rọli tse. <sup>12</sup> Itobọ khi awa mie iJesu suọ, ali khi awa gbo ku gbe ọli ọ, awa rọ a mhue igbedu rọ a lo deba Eshinegba. <sup>13</sup> Itobọ ighọ, a khi zẹ ni egbe pfo ẹ-a ini a suọ abi mhi liẹ mẹ osue shi itobọ khi mhia tse abọ usomhi onete oyi Eshinegba yẹ ẹ. Ochoghọ, a zẹ ni osue ni mhia mẹ o ri ufumhi oyi Eshinegba ghi ẹ.

<sup>14</sup> Lọli o zẹ ni mhi rọ wugha odalo oyi Eshinegba ni ọ khi ita awa a sọ iromhi na ẹ. <sup>15</sup> Rọ te ayi ọli unuekpẹ nya ni e la agbọ ali iloghie e te le eva. <sup>16</sup> Eshinegba ọ mholi ikhivose eniemhi ni ọ rọ ọ na ẹgbọ eyọli, itobọ ighọ mhi rọ lema li, ọ ri Ayemhe oyọli ri udu oye ẹ toto a, <sup>17</sup> ini iKirisiti ọ lo ẹ udu

---

\* 3:6 Li zẹ iKolo 1.26-27

shito kpẹ abi a mie ọli suọ. Mhi gbo lema Ẹshinẹgba ọ rẹ ẹ migha abi ọọra ni o pfi imhili lo eke egbegbo, ni a nono ingme oyi Ẹshinẹgba ali ingme egbe ẹ, ini a khi de. <sup>18</sup> Mhi gbo lema Ẹshinẹgba ọ zẹ ni ẹẹ ali ẹgbọ eyi Ẹshinẹgba nya a dobe leşe abi inono oyi Ẹshinẹgba o gba ramhi. <sup>19</sup> Ẹshinẹgba ọ zẹ ni a leşe inono ni iKirisiti ọ nono awa, inono ni o ghọ fu doşe ode ni ọa mholi ukpese, egheghe agho ni ingeli eyi ẹẹ, e li abi eyi Ẹshinẹgba.

<sup>20</sup> A kpemhi na Ẹshinẹgba ni ọ mholi ekpabo ro riẹle emhi eniemhi, eni e fu doşe emini awa mhila li, ali emini awa da dobe sa. Ekpabo eyoli eni e la awa ayemhe ẹ gbe akanya, ọ deba a riẹle eni emhi na awa. <sup>21</sup> A zẹ ni awa ẹgbọ eyoli ni awa ali iJesu iKirisiti e khi oghuo, e kueghie Ẹshinẹgba, ogbe na akọ ali agboagbo, ya ramhi ukpese. Atse.

## 4

### *Ikugbe onayi eni e miesuo*

<sup>1</sup> Mhemhe ni mhi ri itobo khi mhia ga Onomhue la owa ighumha, mhi lema ẹ, a ke ngeli ingeli enete, enabi Ẹshinẹgba ọ ọ a ke ngeli egheghe ni ọ ro lu ẹ. <sup>2</sup> Emini a riẹle nya, a ke ti egbe ẹ tiemhi eke, a ri ofie ali ikuegbe-a nu egbe ke ngeli. A ri inono ni a nono egbe ri ipfomhe-udu ke ngeli.\* <sup>3</sup> A roshẹka mu ikugbe ni Ayemhe-no-pfuase o ku awa gbe mhue ali elemhi opfomhe ni o genọ awa kugbe. <sup>4</sup> Idiegbe oghuo awa khi, Ayemhe-no-pfuase oghuo ọ la awa egbe, Igho awa gbo li ri eloe shi eke ẹ khe iregbenga oghuo oyi imiepfuese ni Ẹshinẹgba ọ ro nga na awa abi ọ ro lu awa. <sup>5</sup> Onomhue oghuo ni ọ khi iKirisiti,

\* **4:2** Li zẹ iKolo 3.12-13



ali irudunga oghuo, ali ibatizi oghuo, awa mhọli. <sup>6</sup>Eshinegba ni ọ khi itawa nya, awa a ga, lọli ọ mhẹsẹ a na awa nya, lọli ọ ri awa a gbe akanya oyọli, lọli ọ gbo la agbọ oyawa nya.

<sup>7</sup>Ama iKirisiti ọ kemhi afu ọdọda kẹ a na ọgbogbo ni ọ rọ ke gbe akanya oyọli. Lọlighuo ọ mhẹsẹ abi ọ li kemhi wẹ. <sup>8</sup>Ona o zẹ ni ungmehi oyi Eshinegba o rọ ọ. “Abi ọ rọ khọli ebe ọli pfuse-anya, ọ nga obini o yagha nẹ nya, ọ ri ebe ọli ni ọ mu ọ le la orọlọ, ee deba li ukhu-khokho abi eni a mu okhọli. Ọ tigbe kemhi isomhopfa enete na ẹgbọ.”† <sup>9</sup>Emini a ri ungmehi oyi Eshinegba ona ngme, ni ọọ, “Ọ nga obini o yagha,” lọli khi, eri iKirisiti ọ kpẹ tiemhie agbọ ona, neni ọ nga idane obini o yagha. <sup>10</sup>Ijesu iKirisiti ọni ọ tiemhie agbọ ona, ọ gbo nga obini idane iloghie ni o yagha nẹ nya, ini ọ zẹ emhikpa ukhomhi ni e guẹ ga ti. <sup>11</sup>IKirisiti ọ kemhi afu na kẹ na ọgbogbo. Ọ zẹ eghuo ighiusomhi na kẹẹ eyọli, ọ zẹ eghuo emekeguele eyi Eshinegba, Ọ zẹ eghuo eni e kia tse abọ ungmehi oyi Eshinegba, ọ zẹ eghuo eni eri ukpẹloẹ ẹ khu ẹgbọ eyi Eshinegba ali eni ẹ sẹsẹ wẹ. <sup>12</sup>Eri ọ lina kemhi afu na wẹ ni e rẹwẹ ke gbe ikanya eyọli, ini eni e khi idiegbe oyọli e ke fu shọ, isheghọ ni idiegbe oyi iKirisiti o totoa elemhi ugamhi oyọli. <sup>13</sup>Ina a li ya ke mẹ ọli, ramhi ẹghẹghẹ ni awa nya awa rọ kugbe ẹ khi ọghuo (abi awa mie Eshinegba suọ, ni awa gbo lẹsẹ omi ọli), ya ramhi ni awa rọ fu shi imiesuọ mele eni e womhẹloẹ shi imiesuọ, ramhi ni awa rọ ya womhẹloẹ nya abi iKirisiti. <sup>14</sup>Eghẹghẹ aghọ awa aa ke ẹa li abi eniye,

---

† 4:8 Li zẹ Iwolo 68.18

ini ẹgbọ eni ẹ di ẹgbọ e khi doḅe di awa ya mie emini ẹa khi egbegbingme suọ. Awa aa ke ya li abi ọkọ-okẹ oniẹmhi ni akpekpeli oniẹmhi o tsua gasẹ ukhomhi okẹ oniẹmhi, <sup>15</sup> ni awa ri ochoghọ ke ngme igesikia elemhi inono, ni awa womhelo shi emhikpa, ni awa li abi iKirisiti Onomhue, oni ọ li abi ukhomhi, awa li abi idiegbe oyọli. <sup>16</sup> IKirisiti ọ ku ẹgbọ eyọli nya gbe abi idiegbe ọgbọ o tono elamhi manọ khi oghuo, ni uguabọ ọgbọgbọ o liẹ gbe akanya oyọli. Eghẹghẹ aghọ oni idiegbe nya o fu, o totoa, o womhelo shi ọ, ẹgbọ e mholi inono na egbe.†

### *Awa mu ingeli eyi awa pfi*

<sup>17</sup> Itobọ ona, mhi lo ye ẹ ude, itobọ eva oyi Onomhue, a khi gbo ngeli abi ẹgbọ ni ẹa leṣe Eshinegba, ni usamhi ni ẹẹ sa ọa mu amẹ. <sup>18</sup> Ẹgbọ eghoghọ ẹa ya doḅe leṣe udi emhi eyi Eshinegba gboo. Ẹa mhue obọ shi agbọ onogbọ oyi Eshinegba, itobọ umha leṣe Eshinegba oyewẹ, igbe udu oyewẹ o tsua ghi wẹ. <sup>19</sup> Egbe ẹa kẹ lili wẹ ini ẹ riẹlẹ ingme ebe. E she ri egbe wẹ na ikanya ebe eni ẹ ghọle wẹ dẹ. Ingeli khi ingeli eyi itsebọ ẹẹ ngeli. Ingeli eghoghọ ẹ ghọle wẹ eghẹghẹ kpa e ke ngeli.

<sup>20</sup> Ama, ọa khi ina a seṣe ẹ a li ke ngeli abi a rọ leṣe mie iKirisiti suọ. <sup>21</sup> Mhi leṣe khi a she suọ ingme oyọli, a gbo seṣe ẹ igesikia ni o la ingme oyọli. <sup>22</sup> Emini a seṣe ẹ khi, a khi ke ngeli eni ingeli ni a kpẹ ngeli, ni oghuẹmhẹ egbe ni ẹa ti eghọ e rẹ ẹ ngeli, ni e yese ẹ agbọ-a. § <sup>23</sup> A zẹ ni Eshinegba ọ mu isamhi ali ingeli eyi ẹ pfi ya khi enegbọ.

† **4:16** Li zẹ iKolo 2.19    § **4:22** Li zẹ iKolo 3.9

24 Eshinegba ọ she ri ingeli enegbo enabi eyoli na ẹ. Itobo igho a ke ngeli abi Eshinegba, elemhi ingeli enete ali ipfuase.\*

25 Irarigho, a khi ke gbo lo egbholi, ama a ke gue igesikia ye egbe, itobo khi eri awa li abi iguabo ododa eyi idiegbe oghuo.† 26 Ini u me elemhi ibibi, khi lamhe, khi ze obili o bi ya ẹ elemhi-ibibi oye shi ẹ elemhi,‡ 27 Khi ri egheghe na okphaghe ni o mu ẹ fe. 28 Oni o kpe ẹ do ughiatọ o khi ke gbo do, ama o ri abo eyoli ke gbe akanya ni o te me ẹ ke le, ni o gbo te me ẹ ke kemhi na eni ẹa mholi.

29 A khi ke ngme ingmemhi ichimhi unu, ama a ke ngme ungmehi onete ni e ri egbe ẹ mu ogbo ni e ri ogbo ẹ fu shi imiesuo. Zobe ni ungmehi oyi ẹ o gue ke de shi egheghe ni a kha ro ngme oli, ni o mholi ikpaghiobo na eni e suo li. 30 A khi ri egbe pfo Ayemhe-no-pfuase oyi Eshinegba-a. Itobo khi Ayemhe-no-pfuase khi ojele ni Eshinegba o shi shi ẹ egbe, ni o re lese oli shi udu gboo khi ogbele oo bhale ni o ya pfa ẹ olamhe eye ẹ shi eke. 31 Zobe ni, iyese-a, ofu, elemhi ibibi, okholi, ali iyese egbe eva, ghe imuegbe obe kpa, ali ikanya ebe nya, e lase ẹ udu le. 32 A ke mholi ilelemhi na egbe ẹ. A ro ke topfa egbe abi Eshinegba o ri itobo iKirisiti ro topfa ẹ.§

## 5

### *Angeli oyi oni o miesuo*

\* 4:24 Li ze Igbae 1.26; iKolo 3.10 † 4:25 Li ze iZaka 8.16

‡ 4:26 Li ze iwolo 4.4 § 4:32 Li ze iKolo 3.13

<sup>1</sup> Irarigho, a roshẹka ke khonya Eshinegba abi a ro da khi imi oḷi ni o nono egbegbo egho. <sup>2</sup> A la agbo inono, ezeze abi iKirisiti o nono awa ni o ro ghu-a na awa abi iluasobo ni e kphela ni e ghole Eshinegba.\*

<sup>3</sup> Abi a ro khi egbo eni e pfuase egho, a khi rielle emini oḷa gbe akanya nabi itsebo, ukeliye emini oo pfi omama. A khi khi ena-emhi-ituegbe. Emhi enana eḷa khi emini a suo khi a me iteva oye e egbo eyi Eshinegba ni e khi eni e pfuase. <sup>4</sup> A khi gbo ngme ingmemhi omama ali ungmehi oyeghe unu, we khi eri a gbudu li iweghiye ali iba izeze ni e we-a. Ochoghọ, a ke kuoghiye Eshinegba. <sup>5</sup> A lese khi, ghe egbo ena itsebo, ali ona ingeli omama, ali ona emhi ituegbe, khi eḷa ya mholi okemhi shi iloghie oyi iKirisiti ali oyi Eshinegba. Eri ona emhi-ituegbe o li abi oni oo ga ikhumhi.

<sup>6</sup> A khi ze ni ogbokhoghuo o ri ingmemhi afue di e, itobo khi egbo eni e ngeli ingeli olamhe eghoghọ, Eshinegba o ya na we ali egbo ni eḷa ya suo eso na li osue. <sup>7</sup> Irarigho, khi ku ma egbo eni e ngeli ingeli olamhe eghoghọ o. <sup>8</sup> Elele a kpe la alo ebili, ama memena elemhi akpa a ke la, itobo khi, a ku ma Onomhue o. Irarigho, a ke ngeli abi eni e la elemhi akpa. <sup>9</sup> Itobo khi onete ali ipfuase, ghe igesikia e khi umomhi ni akpa o ro lasele. <sup>10</sup> Roshẹka ni u wena emini e ti Onomhue eloe, ni u ke rielle we. <sup>11</sup> Khi ke nu egbo na alo ebili gbe ikanya afue na alo ebili, ni eḷa mhue eleli. Ri ochoghọ ke khueghie osheli oyewe-a. <sup>12</sup> Emhi omama oo khi, ini a ta unu emini egbo ena alo ebili e rielle elemhi osheli. <sup>13</sup> Ama,

\* **5:2** Li ze Okiali 29.18; Iwolo 40.6

ini ákpá o khueghie ikanya eghoghò-a gbo o, egbo e ya leşe emini e khi, <sup>14</sup> itobò khi ákpá ọọ khueghie emhi nya-a, ni a ke mẹ gbo o. Lọli Ebe-no-pfuase o rọ, “A guale eni ẹ leşe a, a khi li abi ọni ọ ghua, ni ákpá oyi iKirisiti o la ẹ egbe ke ẹ.”

<sup>15</sup> Itobò ighò leşe abi u ke li ya ke ngeli. Khi ke ngeli abi oyeghe, ama ke ngeli abi olesingme. <sup>16</sup> Ini u da mholi eghẹghẹ rọ ya rieleş onete ne, nyanya rieleş ọli, itobò khi agbò ingme-obe awa ke la.† <sup>17</sup> Itobò ighò a khi khi eyeghe, ama a zẹ ni a leşe emini ẹ ghọle Ọnọmhuẹ ni a ke rieleş. <sup>18</sup> Khi da onyọ pfueche egbe-a, ochoghò zẹ ni Ayemhe-no-pfuase o ke vọ agbọ oyẹ. <sup>19</sup> A ke to iwolo ena irudunga khasẹ egbe, ke to uwolo eni e te ẹ udu lase ke kuẹghie Ọnọmhuẹ. <sup>20</sup> Egheghe kpa, ke kuẹghie Eshinegba ita awa shi emhikpa, itobò iJesu iKirisiti Ọnọmhuẹ oyi awa.‡

### *Ingeli oyi emose ali ikpotso ni e la ughue*

<sup>21</sup> A ri egbe tiemhie na egbe ẹ pfo nya itobò khi u mu ekpe na iKirisiti. <sup>22</sup> Eẹ ikpotso ni a la ughue, a ri egbe ẹ tiemhie na ọdọ ẹ, abi u li ri egbe ẹ tiemhie na Ọnọmhuẹ.§ <sup>23</sup> Itobò khi omose ọ khi ukhomhi oyi ọkpotso ọni ọ rọ shi ughue, ezeze abi iKirisiti ọ khi ukhomhi oyi igba oyi egbo eni e mie ọli suọ. Eni e mie ọli suọ e khi idiegbe oyọli ni ọ mie pfuese. <sup>24</sup> Itobò ighò ọkpotso ogbogbo ni ọ mhuẹ ọdọ, ọ nyese ukhomhi na ọdọ li pfo, elemhi emhi nya, abi igba oyi eni e mie iKirisiti suọ e li ri egbe we na li.

---

† 5:16 Li zẹ iKolo 4.5 ‡ 5:20 Li zẹ iKolo 3.16-17 § 5:22 Li zẹ iKolo 3.18; 1 iPit 3.1

25 Ẹẹ emọse eni e ri ikpotso shi, a mhọli inono ni o te eke elemhi udu lasela shi ighue ẹ ọ, ezeze abi iKirisiti ọ nono igba oyi eni e mie ọli suo, ni o ze khi ọ ghu-a na we.\* 26 Ọ ri itoto oyi ungmehi oyi Eshinegba ri eni e miesuo khi eni e pfuase, ọ ri amẹ khuese we-a ni e dala. 27 Eri ọ riele ona na igba oyi eni e mie ọli suo, ni ọ ro ri ewe somhi otse, ni e ze ọli ro migha odalo oyoli, ni e khi egbo ni uchimhi ọa ta ma egbe, wekhi eni e mhọli ichinya, u ke lie khi emhi olese ni ọa ti, ama ni e khi eni e pfuase ni ẹa mhọli umha-guekia. 28 Ina, ẹẹ emọse e li nono ingme oyi ughue we abi e nono ingme oyi idiegbe oyewe. Ọni ọ nono ingme oyi ughue ọli ingme egbe ọli ọ nono. 29 Ini a mema bino ọ bie, a ya me khi ọgbokhoghuo ọa ya biselemhi egbe ọli, ama eri ọ ri emhi na egbe ọli ẹ le, ọ ri ukpeloe ẹ khu egbe ọli, ezeze abi iKirisiti o li ri ukpeloe ẹ khu igba oyi eni e mie ọli suo oyoli. 30 Uguabo idiegbe oyi iKirisiti awa khi. 31 “Onana o ze ni omose ọ ro ri ita li ali inyo li ẹ shi eke, ọ ya toma ughue ọli ọ, egheghe agho wewe aava e mele ọgbọ ọghuo a.”† 32 Ukpokpomhi osheli na ni mhi gue ẹ le, ni o la iteva iKirisiti ali igba oyi eni e mie ọli suo. 33 Ama, ni mhi ro gbe ọli ukhomhi, omose ọgbogbo ọ lolo nono ingme oyi ughue ọli abi ọ li nono ingme egbe ọli, yeye ọkpotso ni u la ughue, lolo mu ekpe ke na ọdo ẹ.

## 6

### *IPolu ọ ye eniye ali eni e bia we ude*

---

\* 5:25 Li ze iKolo 3.19; 1 iPit 3.7 † 5:31 Li ze Igbae 2.24

<sup>1</sup> Eniye, a ri ungmehi oyi eni e bia e ke gbe akanya, itobọ khi lọli o ti ni eni e mie Ọnọmhuẹ suọ e ke riẹle.\* <sup>2</sup> “Mu ekpe na ita e ali inye e.” Ona o khi ushi oni odode ni Eshinegba o shi ni o ri ishiobọ ma. <sup>3</sup> “Ini u mu ekpe na eni e bia e, agbọ oyẹ o ya ke je odalo egbegbọ, u ya gbo li agbọ tẹse agbọ ona.”† <sup>4</sup> Eẹ ita eniye, a khi riẹle emini o ri elemhi e ke bi imie, a ri ochoghọ ke ri ukpeloe khu we, a ke sese we ode oni o ghọle Ọnọmhuẹ.‡

*IPọlu o ye ighumha ali eni e mhọli we ude*

<sup>5</sup> Eẹ ighumha, a ri ungmehi oyi oni o mhọli e ni o la agbọ ona ke gbe akanya. A rọte ekelemhi udu ke mu ekpe na we. A ri ukpeloe oni o fu ke bino we abi a kha li ri ungmehi oyi iKirisiti gbe akanya. <sup>6</sup> A ke ri ingme oyi ewe gbe akanya eghẹghẹ kpa, ọa khi ini e bino e tse a rọ ri ingme oyewe ke gbe akanya ini e ba ke kuẹghie e. Ama a ke li abi ighumha eyi iKirisiti e li mu ekpe e na li, ikhi eni e rọte ekelemhi-udu oyewe e riẹle emini Eshinegba ọọ a ke riẹle. <sup>7</sup> Rọte elemhi udu oyẹ ke gbe akanya abine khi Ọnọmhuẹ wa ga, itobọ o a khi egbọ tse awa ga. <sup>8</sup> Rọli shi udu khi Ọnọmhuẹ o ya somhi ogbogbọ opfa shi ikanya enete ni o gbe, shi oghumha o, shi oni o a khi oghumha. § <sup>9</sup> Eẹ eni e mhọli ighumha, a li gue ke ngeli deba ighumha eyi ee, A khi so we ulishi khi a ya nase we. A lese khi oni o mhọli e, mhọli ighumha eyi ee, o la iloghie. Lọli o khi oni ọa mhuẹ khi ọna o kpe mhe dose ogho.\*

\* **6:1** Li ze iKolo 3.20 † **6:3** Li ze Okiali 20.12; iDeut 5.16 ‡ **6:4** Li ze iKolo 3.21 § **6:8** Li ze iKolo 3.22-25 \* **6:9** Li ze iDeut 10.17; iKolo 3.25; 4.1

*Abi eni e miesuo e li nu okphaghie e kholi*

<sup>10</sup> Ni mhi ro gbe oni ungmehi oyemhe ukhomhi, a rote obo oyi Onomhue mie itoto eniemhi. Rote ekpabo eniemhi eyoli mie itoto. <sup>11</sup> Rue itsua okholi nya ni Eshinegba o ro ne so, ni u dobe nu (ekpabo ali ode ebubu ni okphaghie o rote e lasele shi ogbo o) khe abo pfuse a. <sup>12</sup> Itobo khi oa khi egbo nabi awa, awa nu e kholi, ama itoto ali ekpabo ali ighie eyewe ni e mhesa agbo ona alo ebili, ali ayemhe ebe eyi okphaghie ena irarogbe ni awa a ya me. <sup>13</sup> Itobo igho ri itsua okholi eni Eshinegba o ro ne nya so, ini u dobe kholi ele ni ekpabo ebe e mu okholi e vule shi e o. Ini u kholi se nya, gbe lighi.

<sup>14</sup> Mu egbe ni u ro kholi okholi elemhi ayemhe. Eghenge kpa, mie emini e khi igesikia suo. Eri ona o li abi ogbene ni okholi-okhue o ro mu oku. Ke ngeli ingeli eni e migha shi ipfuase odalo oyi Eshinegba. Ona o migha shi awulu akhuli ni a ro mu aye ini a ya kholi.† <sup>15</sup> Ke mu egbe eghenge kpa ni u ro gue usomhi onete oyi Eshinegba oyi opfomhe le, onana o li abi eku ni okholi-okhue oo so shi awe.‡ <sup>16</sup> Ke regbenga Eshinegba, ona o ya khukhu e obo oyi ikuatse ni okphaghie oo nono ni lolu kualie e, eri ona o li abi ofiasa ni okholi-okhue o ro mholi obo ro ke fiase ote-osue erali kua. <sup>17</sup> Yelele khi Eshinegba o mie e pfuese. Onana o li abi arula akhuli ni okholi-okhue o ro rughu e ye okholi. Rue ungmehi oyi Eshinegba ni Ayemhe-no-pfuase o ro ne mhue obo ke kholi, eri o li abi ogbhoro ni a ro kholi okholi.§ <sup>18</sup> Ro

† **6:14** Li ze Aza 11.5; 59.17    ‡ **6:15** Li ze Aza 52.7    § **6:17** Li ze Aza 59.17



te elemhi Ayemhẹ no pfuasẹ ke lema ẹghẹghẹ kpa. U kha lema, ke sọ iromhi ọdọda. Ke liẹ Eshinẹgba ọ kpaghiẹ ẹ obo. Abi u liẹ lema, ke tokpẹ. Ke lema na ẹgbọ eyi Eshinẹgba ẹghẹghẹ kpa. <sup>19</sup> A gbo li ke lema na mhe ni Eshinẹgba ọ ri ungmehi shi mhe unu ẹghẹghẹ kpa ini mhi ya khueghie unu a ngme, ni mhi dobe khueghie osheli ni o la usomhi onete oyi Eshinẹgba-a khasẹ ẹgbọ, ini mhi khaa ngme, ni ulishi o khi mu mhe. <sup>20</sup> Oni ọ to-ẹoli iKirisiti ẹ tse abọ usomhi onete oyi Eshinẹgba ona mhi khi. Ona o zẹ ni mhi rọ la owa ighumha. Itobo ighọ, a ke lema na mhe ni Eshinẹgba ọ ri udu na mhe ke tse abọ usomhi onete oyọli abi mhi kha li tse ọli.

*IPọlu ọ lema Eshinẹgba ọ khivoşẹ na eni e miesuọ*

<sup>21</sup> Inyoghwo awa ni awa nono ingme oyọli, ni ọ gbe akanya oyi Onomhue te ode igesikia, iTakikosi ọ khi. Ọ ya gue ingme eyemhẹ nya ye ẹ, ni a rọ gbo leşẹ abi o li mhe egbe ali emini mhia rişẹ.\* <sup>22</sup> Itobo ighọ mhi rọ ghie ọli ghi ẹ, ni a rọ leşẹ abi anye li la ọ shi, ni ọ gbo ri udu shi ẹ ọ.† <sup>23</sup> Eshinẹgba ita awa ali iJesu iKirisiti Onomhue, e ri opfomhẹ na ẹ ni a miesuọ. E ka re ẹ nono ingme egbe ẹ, ali ni a kie ke mie iJesu suọ <sup>24</sup> Eshinẹgba ọ ka li okhale na ẹgbọ nya ni e nono ingme oyi iJesu iKirisiti Onomhue oyi awa, ikhi inono ni ọa ya pfo ghue.

---

\* **6:21** Li zẹ Ika 20.4; 2 iTimo 4.12    † **6:22** Li zẹ iKolo 4.7-8

**Ebe-No-Pfuasę Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

03be06b0-68fd-500b-b9a9-6bca4b63979a